

Ka'a tu panbubuu

Ma'aq tu maqanglasang tu qabasang. Masituqasdaingaz naak a tina, papia ka masinauba saipukun. Paaqpuun, madia ka kuzkuza'un qai, siata amin a iskakalunan.

Daqdaqanin naipa kantingmut min'a'nuqu pit'ia qaising. Dumanan is kabala'ang mabazu maduq, tudiip haiza qaising kaunun. Dumanan is mapit'ia hutan, tai siin tangtang pu'i. Tuza tu miqdi qaitu, asa dau tu saudiip a sinkalun. Uu tu, Haiza istaa ka iliskinan tu asa mating'na vingkiu.

Pankanaqtungin Kukuminkaku isbu'anin qai, na'asa'ang dau matingna vingkiu. Tuza tu atalu naipa siking. Uu tu, kaming naipa siza kazukunivu siin taimilumaq tu ingkang munhaan pasnanava'anta mapatukii. Ihaan tastuqani'an, munhaan naipa pasnanava'anta vingkiu. Anpasdu'un i qudas ma'anak maludaq, kahau'un tu, "Kama'aq vingkiu! Namunquma ki uka kaunun." Uu tu, nii naipa laktan miliskin tu na'asa'ang mauqna vingkiu. Paaqpuun, kutunlaqbing kantingmut kaming musbai munhaan pasnanava'anta vingkiu. Taunasanavanin a, mapising naipa mulumaq.

Tungqabin haan tanbaaq lumaq tu ismuuta. Tindumdumin a diqanin. Luluklas a qudas kikilim istaa. Samuq is minsuma ka asu malulunglung

istaa, tinaniap a qudas tu na'ikumbuti tungqabin. Tinsuu ka qudas sibutbut siata, kalimangmang maludaqludaq. Tupa ka qudas tu, "Muqnang asu munpasnanava'anta, nakalibungqa'uk su'u bantas qai! Minma'aq a binanau'az vingkiu, nasiza'unin bunun qai pitubunun a sihil." Paiska'ita'in naipa kaupaqani'an mungququma. Duma'anan is munhaan linpan misakuli, ansasaqan tangadaingaz masusuaz i lukis. Tuza tu miqdidaingaz i, aupa masmuav istaa ka tama tu malkadadavus, nii tu maqtu mindangaz lumaq tu iskuzakuza. Haiphaipinti, tudiipin pavingkiu'un a masinauba qai, nii tu malusbut munhaan pasnanava'anta. Lusqa'in panbubuu misbu. Iliskinun tina ka, suqaisan istaa ka qudas qalinga tupa tu, "Qabasang saak asa vingkiu, kamangmangan saak su'u maludaq tu, nii tu maqtu vingkiu. Sadu'i ka masinanauba'un, uka tu tatini asa vingkiu."

Isia aipi inaaq tina uvaz'azang tu iniqdi'an, nii tu maqtu saudiip a iliskinan. Paaqpuun, dangianin laupaku ka madadaingaz sui ka, maqtu'in pavingkiu uvavaz'az. Asa ata maikikingna tu matinmananu vingkiu, latuza madadaingaz tu sinqaqasam. Ka'a tu minpapanu! Tudiip qabasin haiza masihal tu kuzkuza'un, malisihalsihal malisvalavala miqumis.

115 年全國語文競賽臺中市複賽臺灣原住民族語言朗讀文章 【巒群布農語】 國中學生組 編號 1 號

不要輕易放棄

母親是家中的長女，幾乎什麼事情都要交待她去做。她一大清早就起來煮飯，但心中渴望讀書。小學畢業後，不顧家庭的反對，偷偷去報名初中，但被家人發現、反對。從此，每天下田工作，偶爾去林班場打零工、種樹苗。她希望弟弟妹妹們實現她未完成的夢想，但弟弟妹妹們對學習興趣缺缺。這是母親小時候的憾事。

如今，許多父母已能夠供養孩子上學。我們應當珍惜，不要動不動就半途而廢。相信努力的付出，將來會迎來好工作，過著美好人生。